



60

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

C40-4514

羽上座請大師  
家書置之武藏院  
戒微笑塔院印永  
為學者不敢許出院內  
當山二世鐵牛機謹誌



B 64853

# 阿毗達磨大毗婆沙論卷第一百八十一

唐三藏法師玄奘奉詔譯

定蘊第七中不還納息第四之八

如說我弟子中大迦葉波少欲喜足具杜多行薄矩羅少病節儉具淨戒行此二何差別答尊者大迦葉波所得飲食若麤若妙隨次第食無所揀別猶如良馬隨得而食尊者薄矩羅所得飲食或麤或妙揀去妙者而食麤者問何故尊者大迦葉波麤妙等食尊者薄矩羅簡妙食麤答尊者大迦葉波具妙樂欲住

沙門法具妙樂欲故不簡妙食住沙門法故不簡麤食但隨所得次第而食尊者薄矩羅具麤樂欲住沙門法具麤樂欲故簡去妙者住沙門法故而食麤者復次尊者大迦葉波廣識大福易得衣服飲食臥具醫藥及餘資具先不受杜多功德而能奉行彼由二緣極爲難事謂易得利養不受杜多功德而能奉行尊者薄矩羅非廣識大福難得衣服飲食臥具醫藥及餘資具先受杜多功德亦能奉行少識苾芻受杜多功德於中隨轉此不爲難彼由二緣非爲難事謂難得利養先受杜多功德隨而奉行有於此文作相

違誦謂尊者大迦葉波廣識大福易得衣服飲食臥具醫藥及餘資具先受杜多功德隨而奉行尊者薄矩羅非廣識大福難得衣服飲食臥具醫藥及餘資具先不受此杜多功德隨而奉行少識苾芻不受杜多功德於中隨轉非爲難事彼由二緣非爲難事謂難得利養先不受杜多功德於中奉行此顯迦葉波由三事故勝謂具妙樂欲易得利養受行杜多功德問何故尊者薄矩羅簡去妙食而食麤者答意樂力故有情意樂不同隨所意樂而食不可責其所以有說精妙飲食多用功成不欲勞費是故不食有說精

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

妙飲食增長貪愛多由起諍是故不食有說好食乃是富家所有爲益貧家是以不食有說美食必因害多生命斷百千頭在於地上以多身分血肉所成愍彼有情是故不食有說美食多生種種過患是以不食問如所說薄矩羅簡去妙者爲初卽不受爲受已棄之設爾何失若初卽不受云何名受行次第乞食杜多行者若受已棄之云何不損壞施主施物答應言初卽不受問若爾云何名受行次第乞食杜多行者答彼尊者得天眼願智將乞食時先觀何方何村落里巷惟有麤食知已便往次第行乞如契經說有

四聖種一依隨所得食喜足聖種二依隨所得衣喜足聖種三依隨所得臥具喜足聖種四依有無有樂斷樂修聖種問世尊何故說此契經答爲諸弟子安立產業及所作故謂前三安立產業第四安立所作前三安立產業者謂捨四種業行一種業捨四種業者一農務爲業二商賈爲業三傭作爲業四自在爲業於此皆捨行一種業者惟以乞求爲業有說爲顯示無盡資業及所應作故復次爲顯示無損害資業及所應作故復次爲顯示無罪資業及所應作故復次爲顯示不共外道資業及所應作故此中資業謂

前三所應作謂第四有說爲顯示道及道資糧故此中前三顯道資糧後一顯道如道及道資糧如是沙門沙門資糧婆羅門婆羅門資糧梵行梵行資糧應知亦爾由此等義故佛說此聖種契經問聖種自云何答皆以無貪善根爲自性有說前三是無貪善根後一是精進如是說者初說爲善皆對治貪故問若爾依何別義說四種耶答爲對治四種愛故謂於衣喜足對治衣服愛於食喜足對治飲食愛於臥具喜足對治臥具愛樂斷樂修對治有無有愛由此故說皆無貪性若兼相應隨轉則欲色界五蘊性無色界四蘊性此是聖種自性是我是物是性是相是本性已說自性所以今當說問何故名聖種有說亦聖亦種故名聖種謂善故名聖無漏故名聖卽此能生諸功德法相續不斷故名爲種有說聖之種故名爲聖種聖謂一切無倒善法此四能生而相續故說名爲種有說此於聖者相續中行令彼不斷故名聖種有說此於聖者相續中可得令彼不斷故名聖種有說聖謂可愛可喜可樂可意之果此能生彼相續不斷故名聖種此依等流果說有說聖名可愛可喜可樂可意異然此能引彼相續不斷故名聖種此依異

熟果說有說聖者卽是佛獨覺聲聞彼從此生相續不斷故名聖種有說正法名聖此能住持令久相續故名聖種是以正法住世經於千載而不滅者皆是聖種之力如椽梁持舍使不散壞由此等緣故名聖種界者皆墮三界及不墮界問色界無飲食無色界無前三云何三界皆具四種答彼雖無食等而有彼喜足功德有說由下界具四種故展轉引生上界者亦具四種尊者世友作如是說上界雖無食等而有彼對治然對治有四種謂斷對治厭壞對治持對治遠分對治色界於食等具四對治欲界有三除斷對

治無色界有二謂持及遠分尊者覺天說曰如雖無有無漏衣食等而有無漏聖種如是雖無色無色界食等而有彼界聖種大德說曰不顧戀身之資具尚名住聖種者況彼亦不顧戀身而當無聖種耶地者有漏在十一地無漏在九地所依者皆依三界行相者皆作十六行相及餘行相所緣者皆緣一切法念住者皆四念住智者皆入智或十智三摩地俱者皆三三摩地俱及非俱根者總說皆與三根相應謂樂喜捨世者皆墮三世緣三世及離世善等者皆是善緣三種欲界繫等者皆三界繫及不繫緣亦爾問若

爾施設論說云何通如說四聖種皆不爲煩惱所染  
所雜答彼遮煩惱相應不遮有漏故無過學等者皆  
通三種緣三種見所斷等者皆修所斷及不斷緣三  
種緣名緣義者皆緣名義緣自相續他相續非相續  
者皆緣三種加行得離染得生得者是加行得離染  
得非生得有說亦是生得如是說者初說爲善若生  
得善亦是聖種者蟻卵蚊蟻等亦成就聖種耶是故  
聖種不攝生得善問聖種爲聞爲思爲修所成耶答  
通三種攝爲意地爲五識答惟意地非五識有說亦  
通五識評曰不應作是說所以者何五識中善惟生

得故問若是加行善者外道所得靜慮無量無色解  
脫勝處徧處等亦是聖種耶答彼非聖種所以者何  
若欣樂解脫耽生死彼善根是聖種外道所樂皆  
是生死故彼善根不名聖種復次於有有具生喜足  
名聖種外道善根與此相違故非聖種以五頂外道  
等亦求生天受欲樂故復次聖種皆是出家品善根  
外道善根皆是在家品攝故非聖種問少欲喜足俱  
對治貪無貪爲性何故喜足立聖種非少欲耶答少  
欲之名有過失有增益喜足不爾有過失者但言少  
欲不言無欲故有增益者於實無欲而名少欲故於

喜足中無如是事故立聖種有說少欲於未來處未得事轉喜足於現在處已得事轉不取現在一迦履沙盃擎爲難非於未來轉輪王位似喜足難故立爲聖種有說爲異外道故不說少欲爲聖種若說少欲爲聖種者諸外道輩當作是言我等真是住聖種者所以者何汝等猶著糞掃衣而我等露形無衣汝等猶乞食自活而我等多自餓不食汝等猶坐樹下而我等或常舉手躋足而住是故我等真名住聖種者爲遮彼故但說喜足爲聖種外道於有有具不喜足故問少欲喜足何差別有說少欲惟在意地喜足通六識身有說少欲惟欲界喜足通欲色界有說少欲惟欲色界喜足通三界有說少欲墮三界喜足三界繫及不繫如是說者少欲喜足俱通三界繫及不繫問若爾何差別答少欲於未來處未得事轉喜足於現在處已得事轉是謂差別問病緣醫藥所生喜足何故不說聖種耶答亦應說聖種而不說者當知有餘有說已攝在前所說中謂病緣醫藥有二種一可食二不可食可食者攝食中不可食者攝衣服臥具中有說爲欲饒益病苾芻故不說於藥喜足爲聖種謂有苾芻身雖有病以少務故不求醫藥若佛立此

論

法華經疏卷二十一

七

卷二十一

爲聖種者彼便守病不能勤修聖道加行爲饒益彼令勤修道是故不說彼爲聖種有說若受用時能生放逸於彼喜足立爲聖種病緣醫藥於受用時但能除病不增放逸是故不說有說若一切處一切人一切時受用者於彼喜足立爲聖種病緣醫藥非有如是一切受用故彼喜足不立聖種是以尊者薄矩羅言我於佛法中出家年過八十曾不憶身有疾疹乃至頭痛亦不憶受用病緣醫藥乃至訶梨怛雞生欲界者尚然何況生色無色界問何故別解脫律儀惟無表立聖種非表耶答前說相續不斷名爲聖種表非相續不斷是故不說有說無表可與聖道俱故立聖種表不與聖道俱是故不說出家者有四聖種在家者亦有四聖種然出家者二因緣故名有聖種一意樂故二受用故諸在家者由一因緣名有聖種謂意樂故非受用故如天帝釋處妙華座有十二那庾多侍女圍繞六萬音樂而自娛樂於四聖種恒有意樂而無受用頻毗娑羅等諸國王蘇達多等諸長者亦爾問爲有一聖種卽名住聖種者耶答不爾要具四種方名住聖種者然得一聖種時必具得四如無礙解得一必具四過去諸佛皆稱讚糞掃衣而不

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

許著今釋迦佛亦稱讚糞掃衣而便許著問何故爾耶答過去時人貪心微薄雖得價直百千衣服染著之心不如今人染著凡衣故有說彼時人衆豐饒財寶諸苾芻等欲求價直百千衣服易於今時求糞掃衣故尊者世友說曰過去時人意樂廣大見諸苾芻畜上妙資具便生歡喜信敬之心今時人意樂狹劣若見苾芻畜麤弊資具乃生歡喜信敬之心故尊者覺天說曰往昔時人身體細軟若受用麤弊物者則不能自存今世時人身體麤硬雖受用麤弊則能自存故大德說曰過去諸佛稱讚糞掃衣當知卽是亦

許受用若不爾者何故稱讚諸佛不以無事而有所說故如世尊說糞掃衣少易得無罪云何少云何易得云何無罪尊者世友說曰少用功而辦故非多人受用故名少隨彼時處皆可得故名易得佛所聽許故智者受用故名無罪大德說曰少價量故名少不從他求故名易得無攝受故名無罪由二因緣佛說於衣喜足爲聖種一爲訶責於衣不喜足如難陀等二爲讚美於衣喜足如大迦葉波等由二因緣佛說於食喜足爲聖種一爲訶責於食不喜足如婆捨梨等二爲讚美於食喜足如薄矩羅等由二因緣佛

說於臥具喜足爲聖種一爲訶責於臥具不喜足如愚王苾芻等如契經說愚王苾芻白佛言惟願世尊觀我牀座麤弊如是二爲讚美於臥具喜足如頹戾筏多等由二因緣佛說樂斷樂修爲聖種一爲訶責懈怠如闡陀等二爲讚美精進如室路拏等由四因緣則知彼是安住聖種補特伽羅一不樂聞他談得利養二不樂親近貪美食人三所畜資具少而清淨不生染著四於諸利養得與不得不生愛憎如世尊言此四聖種是最勝知是種性知是可樂知是無雜染不可訶責一切世間若沙門若婆羅門若天若魔

若梵若餘世間無能如法說其過者云何名最勝知有說此四聖種能引最勝故得最勝果故趣向最勝故隨順最勝故名爲最勝佛所施設佛所知故說名爲知有說佛說五百聲聞各有最勝之法此四墮在彼最勝法中故名最勝佛知此四是真喜足故名爲知有說佛及弟子名最勝者彼所讚述名最勝知有說佛知此四是勝寶藏能令住者意望滿足故名最勝知謂諸有情多分意望不滿而死惟住聖種者無不意望滿足而死有說佛知此四是無盡藏令諸智者受用無盡故名最勝知謂住此者不假多求及多

譯

釋迦牟尼佛傳記卷之十一

十一

卷之十一

積聚亦無防守門戶關鑰隨意受用終無有盡如轉輪王王四洲界所用財寶可速窮盡受用此四而無有盡云何名種性知答過去跋伽沙等諸佛及佛弟子皆從此生故名種性智者所了故名爲知有說種性者是能持義謂能住持聖教令久不滅故名種性是佛所了故名爲知云何名可樂知答此四是智者所樂智者所知故名可樂知有說佛知此四皆能資助樂斷樂修故名可樂知有說佛知此四是於晝夜各三時中智者隨應愛樂安住而無懈倦故名可樂知有說佛知此四是修行者所樂久住謂從此日後分結跏趺坐安住其中乃至明日初分餘緣所奪方從彼起云何名無雜染答此四聖種不爲煩惱惡業所凌雜故云何名不可訶責答若住此四恒爲住正法諸之所讚美未嘗訶責卽由此故一切世間沙門婆羅門天魔梵等無能如法說其過者尊者世友作如是言佛知此四能入聖胎故名最勝知一切聖者皆從此生故名種性知是行修者晝夜所樂故名可樂知遠離四種世間事業故名無雜染四事業者謂農務商賈傭作自在一切功德由此具故名不可訶責於自於他俱無損害故一切世間沙門婆羅門天

魔梵等無能如法說其過者如薄伽梵於契經中說  
伽他言

諸有伏愛憎 常居邊臥具 恒住不放逸

拔有貪隨眠

問此伽他中爲辯何義答愛謂貪愛憎謂憎恚佛聖弟子若伏此二居邊臥具住不放逸便能永拔有貪隨眠復次若於正法毗柰耶中隨有所得味著心轉說名爲愛於所未得不惑故能俱伏由俱伏故居邊於已得不味於未得不惑故能俱伏由俱伏故居邊臥具住不放逸則能永拔有貪隨眠復次若於上妙

衣服飲食貪求名愛若於麤弊衣服飲食嫌逆名憎佛聖弟子二俱能伏此句顯示於衣服飲食喜足聖種第二句顯示於臥具喜足聖種後二句顯示樂斷樂修聖種問樂斷樂修有何差別答樂斷煩惱樂修聖道復次無間道名樂斷解脫道名樂修復次見道名樂斷修道名樂修如見道修道如是見地修地未知當知根已知根應知亦爾復次樂斷者顯諸忍樂修者顯諸智樂斷樂修是謂差別如說大名學多住五蓋漸斷乃至廣說問何故作此論答爲欲分別契經故如契經說佛告大名學多住五蓋漸斷契經雖

作是說而不分別云何學云何學多住五蓋漸斷彼經是此論所依根本彼所未說者今應說之故作斯論如說大名學多住五蓋漸斷此中云何學答預流或一來云何學多住五蓋漸斷答漸斷漸離漸伏漸背問何故此中不說隨信隨法行名學多住五蓋漸斷耶答應說而不說者當知此義有餘有說隨信隨法行有住五蓋已斷者有住五蓋漸斷者以不定故不說預流一來不爾決定惟住五蓋漸斷是以說之有說若彼身中五蓋煩惱可現行而漸斷者此中則說隨信隨法行有漏善心無覆無記心尚無容現行何況煩惱是故不說問預流一來身中疑蓋已斷惡作雖未斷而更不現行何故說彼多住五蓋漸斷而復說可現行耶答前文應作是說學多住諸蓋漸斷不應言五而言五者事有五故謂貪欲瞋恚睡眠惛沉掉舉有說先斷今斷總說斷五如言斷五順下分結得不還果多住者謂數數住問斷離伏背有何差別有說無差別俱顯斷故有說亦有差別謂斷彼縛故名斷離彼得故名離令不行故名伏伏逆彼故名背復次依無間道說斷依解脫道說離此二依永斷說依近加行說伏依遠加行說背此二依暫斷說復

次依無間道說斷依解脫道說離此二依正斷說依加行道說伏依勝進道說背此二依助斷說復次斷者依斷對治說離者依持對治說伏者依遠分對治說背者依狀壞對治說斷離伏背是謂差別如說苾芻法珊瑚度沙故毗柰耶珊瑚度沙毗柰耶三度沙故法珊瑚度沙乃至廣說問何故作此論答爲欲分別契經義故經說未來有諸苾芻不修身戒心慧彼不修身戒心慧者法珊瑚度沙故乃至廣說契經雖作是說而不分別云何法云何毗柰耶云何法珊瑚度沙故乃至廣說彼經是此論所依根本彼所不說者今悉應說

故作斯論云何法答八支聖道云何毗柰耶答貪瞋癡滅云何法珊瑚度沙故毗柰耶珊瑚度沙毗柰耶珊瑚度沙故法珊瑚度沙答若於八支聖道不修習時彼於貪瞋癡滅不能作證若於貪瞋癡滅不作證時彼於八支聖道不能修習由此因緣故作是說此中珊瑚度沙言有說顯喜足有說顯毀壞若說顯喜足者彼說云何法珊瑚度沙故毗柰耶珊瑚度沙謂於見道生喜足故便於修道不能修習若於修道不修習時便於修所斷煩惱斷不能作證如是法珊瑚度沙故毗柰耶珊瑚度沙云何毗柰耶珊瑚度沙故法珊瑚度沙謂於見所斷煩

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

惱斷生喜足故便於修所斷煩惱斷不能作證若於修所斷煩惱斷不作證時便於修道不能修習如是毗柰耶珊度沙故法珊度沙若說顯毀壞者彼說由毀壞聖道故於貪瞋癡滅不能作證故說法珊度沙故毗柰耶珊度沙由毀壞貪瞋癡滅故便於聖道不能修習故說毗柰耶珊度沙故法珊度沙問聖道與滅無有過失不可毀壞如何言毀壞聖道滅耶答毀壞彼相續說毀壞彼非彼自體實可毀壞謂由煩惱現在前故毀壞相續由相續毀壞故令聖道轉遠由聖道轉遠故於貪瞋癡滅不能作證故說毀壞如契經說此是法此是毗柰耶此是大師教問此三何差別答法謂八支聖道毗柰耶謂貪瞋癡滅大師教謂佛語有說法謂阿毗達磨藏毗柰耶謂毗柰耶藏大師教謂素怛纜藏是謂此三差別如說法隨法行乃至廣說問何故作此論答爲欲分別契經義故如契經說法隨法行雖作是說而不分別云何法云何隨法云何法隨法行彼經是此論所依根本彼所不說者今應說之故作斯論云何法答寂涅槃云何隨法答八支聖道云何法隨法行答若於此中隨義而行所謂爲求涅槃故修習八支聖道故名法隨法行能

論  
一  
六四  
卷之二十一  
三

自一

安住此名法隨法行者問何故涅槃獨名爲法八支聖道名隨法耶答於諸法中涅槃勝故生老病死不能侵故獨得法名八支聖道次彼順彼如王大臣故名隨法故契經說一切法中涅槃最勝有爲法中聖道最勝然舍利子讚學經中說言具壽法之隨法所謂離繫彼契經中聖道名法涅槃名隨法以先得聖道後證涅槃故前經依勝劣次第顯法隨法後經依證得次第顯法隨法復次別解脫名法別解脫律儀名隨法若於此中隨義而行名法隨法行謂爲求別解脫故受別解脫律儀得已隨護無有毀犯名法隨法行能安住此名法隨法行者復次身律儀語律儀命清淨名法受此名隨法若於此中隨義而行名法隨法行謂爲求身語律儀命清淨故受及受已隨護名法隨法行能安住此名法隨法行者問身語律儀命清淨卽是別解脫律儀所攝何故重說耶答前是不分別說今是分別說前是總說今是別說有說前是律儀所攝妙行所攝非離律儀所攝今是律儀所攝妙行所攝亦離律儀所攝有說前顯示所發起今顯示能發起前爲護所發起故護能發起今爲護能發起故護所發起有說前爲護於果故隨護於因今

論

大藏經論卷一百一十一

十一

自

爲護因故隨護於果如因果能作所作亦爾此中別  
解脫戒表及初念無表是尸羅是律儀是妙行是般  
羅底木又是般羅底木又律儀是業是業道是業此後無  
表是尸羅是律儀是妙行是般羅底木又律儀非般  
羅底木又非初解脫故是業非業道究竟思不於此  
轉故如說具壽我今當說般羅底木又汝等諦聽此  
中何法名般羅底木又爲是尸羅爲是說戒者語若  
是尸羅彼不可說何故言我當說般羅底木又若是  
說戒者語彼或善心說或不善無記心說毗柰耶說  
云何通如說般羅底木又是諸善法首上首前行有  
爲說善法首上首等

阿毗達磨大毗婆沙論卷第一百八十一

說一切白部發智

音釋

蹻

丘奴切舉足也

疹

丑乃切病也

鞭

魚孟切堅也

頡

胡結切

惛

呼昆切不明了

論

也

桐城弟子趙士先施賛刻此  
阿毗達磨大毗婆沙論第一百八十一卷 計

字六千七百八十六箇該銀三兩三錢九分  
雙足庵釋真福對長洲徐普書潔水端司亮刻  
萬曆丙辰歲秋八月徑山化城識

# 阿毗達磨大毗婆沙論卷第一百八十二

五百大阿羅漢等造

唐三藏法師玄奘奉詔譯

## 定蘊第七中不還納息第四之九

云何法輪乃至廣說問何故作此論答爲欲分別契經義故如契經說世尊轉法輪諸餘世間沙門婆羅門天魔梵等皆無有能如法轉者契經雖作是說而不分別云何法輪齊何當言轉法輪契經是此論所依根本彼所不說者今應說之故作斯論云何法輪答八支聖道若兼相應隨轉則五蘊性此是法輪自

性是我是物是相是性是本性已說自性所以今當說問何故名法輪答此輪是法所成法爲自性故名法輪如世間輪金等所成金等爲性名金等輪此亦如是有說此輪於諸法性能揀擇極揀擇能覺悟極覺悟現觀作證故名法輪有說此輪能淨聖慧法眼故名法輪有說此輪能治非法輪故名法輪非法輪者謂布刺拏等六師所轉入邪支輪問何故名輪輪是何義答動轉不住義是輪義捨此趣彼義是輪義能伏怨敵義是輪義由斯等義故名爲輪如大四十分門經說有二十善品二十不善品此名梵輪乃至廣說問二十善品可爾二十不善品云何名梵輪耶答佛意不說彼爲梵輪但說於善不善品法有忍智輪名爲梵輪問此何故名梵答極寂靜故離灾橫故無罪累故不惱害故說名爲梵問何故名梵輪答以梵世在初可得及具聖道故名梵輪第二第三靜慮非初可得亦不具聖道第四靜慮雖是佛身初得而不具聖道故不名輪惟有梵世是初可得及亦具足故名梵輪有說修梵行者相續中可得故名梵輪有說對治非梵行故名爲梵輪有說對治三界見所斷非梵煩惱故名梵輪有說此因梵王勸請而轉故名

梵輪有說佛是大梵佛所宣說分別開示故名梵輪  
 有說梵音演說故名梵輪有說惟梵世聖道能對治  
 衆多非梵法故名爲梵輪衆多非梵法者謂三界見  
 修所斷煩惱或不善無記煩惱或有異熟無異熟煩  
 惱或生二果生一果煩惱或無慚無愧相應無慚無  
 懈不相應煩惱或有事無事煩惱或忍所治智所治  
 煩惱如是等名衆多非梵法有說惟梵世有多梵行  
 果故名梵輪多梵行果者謂四沙門果上三靜慮惟  
 有二沙門果無色惟有一沙門果惟梵世十具有四  
 果或九徧知果上三靜慮惟有五徧知果無色惟有  
 二徧知果惟梵世具有九徧知果或八十九沙門果  
 惟梵世具有非於上地是故聖道說名梵輪問何故  
 惟說見道名法輪非餘耶答前說動轉不住義是輪  
 義見道是速疾道不起期心道於動轉不住最爲隨  
 順故獨名法輪有說前說捨此趣彼義是輪義見道  
 中捨苦現觀趣集現觀乃至捨滅現觀趣道現觀是  
 故見道獨名法輪有說以四事故名輪一捨此二趣  
 彼三未降伏者降伏四已降伏者守護見道中亦爾  
 捨此者捨苦現觀趣彼者趣集現觀未降伏者降伏  
 卽集現觀已降伏者守護即苦現觀乃至滅道說亦

如是故名法輪有說迴轉義是輪義猶如車輪周旋  
 迴轉如是見道忍智循環謂忍後智現前智後忍復  
 現前法品類品循環亦爾故名法輪有說上下義是  
 輪義猶如車輪或上或下如是見道緣境上下謂緣  
 欲界已卽緣有頂緣有頂已復緣欲界對治上下說  
 亦如是故名法輪有說見道猶如輻轂輞法故說爲  
 輪猶如車輪轂最居中輻依轂住輞攝於輻如是見  
 道苦集忍智如輻滅忍滅智如轂道忍道智如輞偏  
 緣道故或有說者苦集滅忍智如輻三諦如轂道諦  
 如輞或有說者三諦忍智如輻道忍道智如輞四諦  
 如轂或有說者正見正思惟正勤如輻正語業命如  
 轶正念正定如輞或有說者正思惟正勤正念正定  
 如輻正語業命如轂正見如輞或有說者惟正定如  
 輞餘如前說有說降伏四方義是輪義如轉輪王所  
 有輪寶降伏四洲所有怨敵如是行者以見道輪降  
 伏四諦所有煩惱故名法輪有說見所斷煩惱名非  
 法輪能起八邪支故見道是彼近對治故說名法輪  
 尊者妙音說曰學入支道展轉和合一時至他相續  
 中轉故名法輪此八支道見道位勝是故見道獨名  
 法輪齊何當言轉法輪答若時具壽阿若多憍陣那

論一  
大藏經卷一百一十一  
四

自二

自三

見法問何故復作此論答前雖顯法輪自性而未顯作用今欲顯之故作斯論有說爲止摩訶僧祇部說法輪語爲自性彼作是說一切佛語皆是法輪若謂聖道是法輪者則菩提樹下已轉法輪何故至婆羅癡斯方名轉法輪耶爲止彼意顯法輪體但是聖道非佛語性若是佛語者則應菩提樹邊爲商人說法已名轉法輪何故後至婆羅癡斯國乃言轉法輪耶故知爾時令他身中有聖道起方名轉法輪法輪問道爲體故說齊阿若多憍陣那見法名佛轉法輪問若爾佛於菩提樹下已名轉法輪何故於婆羅癡斯國乃言初轉法輪耶答轉法輪有二種一自相續中轉二令他相續中轉菩提樹下是自轉法輪婆羅癡斯是令他轉法輪佛以饒益他爲正事故依令他轉說初轉法輪有說轉法輪有二種一共二不共菩提樹下所轉法輪與二乘共自利法故婆羅癡斯國所轉法輪不與二乘共利他法故依不共說故言彼處初轉法輪有說與此相違名共不共依共共說轉如共不共曾未曾亦爾有說若於轉時勝獨覺者乃言初轉謂諸獨覺亦能自轉但不令他惟佛亦能令他轉故有說若於轉時有人爲證乃說初轉謂五苾芻

論

卷一百一十一

五

自序

證無我理方能爲佛作證轉法輪人有說婆羅底斯所轉法輪是佛昔日三無數劫所修苦行功勞之果故說初轉所以者何佛若欲於過去佛所般涅槃者卽得隨意所以經於三無數劫精勤修習百千苦行於蘊處界求善巧者皆爲饒益所化有情恒作是願若我證得無上菩提當爲有情開甘露門令皆解脫生死牢獄故今所轉正是昔日苦行之果有說若能降伏他身煩惱方名法輪正所作用如王輪寶降伏他土非但降伏自所住宮如來法輪亦復如是依此說佛初轉法輪問若彼身中聖道生時卽從名爲轉

法輪者何故說佛轉法輪耶答依能轉因故作是說謂彼身中所有聖道世尊若不以言說手爲其轉者則彼聖道無因得生彼聖道生皆由佛力是故說佛初轉法輪如轉輪王未以輪寶置於左手右手轉之則諸天神亦不能轉要王轉已彼能轉之故說輪王能轉非彼此亦如是有說依開覺錄故作是說謂彼身中雖有聖道乃至若未以佛語光而照觸者無由得生彼聖道生皆是佛力是故說佛初轉法輪譬如池中喚鉢羅等種種蓮華乃至若未以日光而照觸者則不開不敷不香日光照時則開敷香此亦如是

有說依除障緣故作是說謂彼身中雖有聖道若佛不以未曾有善巧名句文身除彼身中所有障者則彼聖道無由得生彼聖道生由佛除障是故說佛初轉法輪有說依資助緣故作是說謂彼身中雖有聖道若佛不以法水灌之則聖道芽無由得生彼得生者由佛資助是故說佛初轉法輪如倉中種子闕衆緣故芽則不生當知芽生由資助力此亦如是有說依示導緣故作是說謂彼身中雖有聖道若無如來言說示導彼者則彼身中聖道不轉佛開示故彼聖道轉是故說佛初轉法輪如闇室中以燈炤了便見

種種可取之物此亦如是有說二因二緣生於正見一聞他法音二如理作意由聞他法音故說佛初轉由如理作意故說彼自轉有說若人具足四法名多有所作謂親近善士聽聞正法如理作意法隨法行由親近善士聽聞正法故說佛轉法輪由如理作意法隨法行故說彼自轉法輪問憍陣那住苦法智忍卽應說佛初轉法輪何故乃至道類智時方名爲轉答苦法智忍時雖得一轉而未究竟道類智時於轉究竟有說道類智時三因緣具故說名轉一捨曾道二得未曾道三結斷一味證有說道類智時五因緣

具故名爲轉一捨曾道二得未曾道三結斷一味證  
 四得八智五一時修十六行相捨曾道者謂捨見  
 道得未曾道者謂得修道結斷一味證者謂集證三  
 界見所斷斷頓得八智者謂頓得四法智四類智一  
 時修十六行相者謂一時修苦四行相乃至道四行  
 相有說道類智時已斷一切見所斷煩惱無事煩惱  
 忍所治煩惱永害見邪性故於爾時方說爲轉有說  
 此所言轉依至果位可稱可數有相可說可得施設  
 法補特伽羅而說非於先時不名爲轉有說此所言  
 轉約可命終受生處說非於先時不名爲轉如契經  
 說佛說此法門時具壽憍陣那及八萬諸天遠塵離  
 埴於諸法中生淨法眼此中遠塵者謂遠隨眠離垢  
 者謂離纏垢於諸法中者謂於四聖諦中生淨法眼  
 者謂見四聖諦淨法眼生問佛說此法門時五苾芻  
 皆見法何故但說憍陣那耶答以憍陣那先見法故  
 謂憍陣那已入見道餘四猶在順決擇分善根位中  
 有說世尊於彼有宿願故以彼爲首而轉法輪是故  
 偏說由此佛告憍陣那言汝已解耶彼言已解第二  
 第三亦復如是因斯號彼爲阿若多問世尊何故三  
 問彼耶答彼憍陣那見聖諦已世尊便起前後際智

作是觀察爲憍陣那所應受惡趣相續蘊界處多爲我過去三無數劫所經剎那臘縛牟呼栗多多耶觀已卽見憍陣那所應受無間地獄相續蘊界處多非我過去三無數劫所經剎那臘縛牟呼栗多多見已便作是念我於三無數劫修無量百千難行苦行今得無上正等菩提但令憍陣那爾所無間地獄相續蘊界處住不生法中設我卽般涅槃於我劬勞已爲果滿況作餘事以慶慰故三反問之復次佛見從不可知本際已來憍陣那起煩惱縛一切有情一切有情亦起煩惱縛憍陣那又見憍陣那於一切有情相續中受胎一切有情於憍陳那相續中受胎更相損害更相食噉說亦如是如見前際見後際亦爾佛見此已便作是念我但令憍陣那一人於一切有情離如是事於我三無數劫所修苦行使爲果滿況更饒益無量有情欣慰情深是以三問有說爲止誹謗是以三問謂佛爲菩薩時歟老病死出劫比羅伐窣堵城求無上智時淨飯王遣釋種五人隨逐給侍二是母親三是父親母親二人執愛欲得淨父親三人執苦行得淨當於菩薩修苦行時母親二人心不忍可卽便捨去菩薩知後苦行非道捨而受食羹飯酥乳

以油塗身習處中行父親三人咸謂菩薩狂亂失志亦復捨去於是二女所謂難陀蘇陀跋羅俱來給侍爾時菩薩便作是念若彼五人不捨我者豈令女人來相親近菩薩受食十六轉乳糜已身力轉增從吉祥人邊受取草已詣菩提樹自敷草座結跏趺坐立如是誓我今要當不起此座降魔軍衆永斷諸漏證取無上正等菩提立此誓已尋時摧破三十六俱胝惡魔軍衆以三十四心得阿耨多羅三藐三菩提佛眼徧觀一切世界誰應最初聞我正法我當爲說觀已便知墮達洛迦曷邏摩子應先聞我法是時有天即白佛言墮達洛迦曷邏摩子昨日命過有說七日爾時世尊亦起智見知彼命過便傷歎言彼失大利若彼聞我所說法者當得正解世尊復觀除彼誰應初聞我法我當爲說觀已便知頰邏荼迦邏摩應先聞我法天復白言頰邏荼迦邏摩命過來已經七日有說昨日爾時世尊亦起智見知彼命過而傷歎言彼失大利若彼聞我所說法者當得正解問佛初得阿耨多羅三藐三菩提時何故不爲二人說法而令命過不得聞法將非教化失時耶有說世尊初成佛時未起爲他說法心又未以大悲緣有情界故無化

導失時之咎尊者妙音說曰佛初得無上菩提時受重法故多日思念尚不及起飲食之心況能起心爲他說法復有說者初成佛時亦建立有情三聚差別未知所應化道及非所應故無有失有說彼兩二人善根未熟未堪聞法所以者何佛成道已彼初一人若更經五十七日有餘命者應堪聞法有說五十六日有說四十九日彼第二人若更經五十一日有餘命者應堪聞法有說五十日有說四十三日由此非佛教化失時世尊或時留自壽行待所化者如待蘇跋達羅等若能留他壽行無有是處問佛何故傷歎

耶答佛先以彼二人爲師習世俗定不得真法今佛自證無上真法欲令彼知又欲以已所證饒益於彼而彼命終是以傷歎問前說彼若聞我法者當得正解依何位說得正解耶有說此說入正性離生位有說住順決擇分善根位有說起順解脫分善根位如是說者乃至令彼除一切智增上慢知惟佛世尊具一切智爾時名得正解世尊復觀除彼二人誰復最初應聞我法我當爲說觀已卽知憍陳那等五人應先聞法卽作是念彼皆是我父母親族先來恭敬供養於我今欲酬報爲何所在天卽白言今在婆羅痆

斯國仙人鹿苑爾時世尊亦起智見知在彼處便捨菩提樹步涉而往婆羅彌斯問佛具最勝神足何以步涉往耶答敬重法故不以神足然於行時足常去地如四指量一一足迹皆有喜旋吉祥可愛千輻輪相分明如畫身影所觸乃至七日能令有情至其處者諸根安悅漸次行到婆羅彌斯爾時五人忽遙見佛遂共立制彼喬答摩懈慢多求狂亂失志空無所獲而今復來欲相呼誘我等宜各勿與言談恭敬問訊但勸一常座任其坐不爾時世尊漸行近彼威德所逼令捨本期不覺一時從座而起趨走迎逆合掌歸命於中或有改敷淨座或取佛衣或取佛鉢或有供水或有洗足俱白佛言惟願就座佛便作念如是癡人自立制約須臾還破時佛就座安詳而坐威光奇特如妙高山是時五人雖復恭敬而猶呼佛爲具壽或復稱佛爲喬答摩佛卽告言汝等勿呼如來爲具壽亦勿稱觸姓名若故爾者當於長夜獲無義利受諸劇苦所以者何如來已證無上菩提安隱涅槃度生老病死覺一切法性救護一切爲三界尊成就無邊功德法故時五人言具壽猶是昔喬答摩身形所作不異往日懈慢多求狂亂失志捨於苦行受好

論

方略卷之二十一

十一

卷之二十一

飲食以油塗身皮膚充悅雖知具壽自稱證得無上菩提安隱涅槃誰當相信而不許我稱觸名姓世尊告曰汝今觀我面貌威光諸根容止豈與昔日同耶五人答言我觀具壽實異於昔佛言我若不證法者豈得如是汝應以此證知我得無上菩提何故猶於如來而生不信世尊於是漸漸化誘令其調伏於日初分爲二人說法教誡教授令餘三人入村乞食彼所乞食充足六人於日後分爲三人說法教誡教授令餘二人入村乞食所乞飲食充足五人世尊性離非時食故如是教化經於三月有說四月令彼五人

善根熟已於迦栗底迦月白半八日如來爲彼轉正法輪時憍陣那最初見法佛便三問汝已解耶此意問言汝今觀我是懈慢多求狂亂失志不證無上菩提涅槃而詐汝耶故三問解不彼還三反答言已解此意答言我今觀佛實非懈慢多求亦非狂亂失志又實證得菩提涅槃而非詐我我今爲佛證人故三答已解是故爲止詐誣佛三問之有說爲顯本願滿足是以三問其事云何曾聞過去此賢劫中有王名羯利時有仙人號爲忍辱住一林中勤修苦行時羯利王除去男子與內宮眷屬作諸妓樂遊戲林間縱

論

大藏經卷一百一十一

十一

自二

意娛樂經久疲厭而便睡眠內宮諸女爲華果故遊  
 諸林間遙見仙人於自所止端身靜思便馳趣之皆  
 集其所到已頂禮圍繞而坐仙人卽爲說欲之過所  
 謂諸欲皆是不淨臭穢之法是可訶責是可厭患誰  
 有智者當習近之諸姊皆應生厭捨離王從睡覺不  
 見諸女便作是念將無有人誘奪去耶卽拔利劍處  
 處求覓乃見諸女在仙人邊圍繞而坐生大瞋恚是  
 何大鬼誘我諸女卽前問之汝是誰耶答言我是仙  
 人復問在此作何事耶答言修忍辱道王作是念此  
 人見我瞋故使言我修忍辱我今試之卽復問言汝  
 得非想非非想處定耶答言不得次第責問乃至汝  
 得初靜慮耶答言不得王倍瞋念語言汝是未離欲  
 人云何恣情觀我諸女復言我是修忍辱人可伸一  
 臂試能忍不爾時仙人便伸一臂王以利劍斬之如  
 斷藕根墮於地上王復責問汝是何人答言我是修  
 忍辱人時王復令伸餘一臂卽復斬之如前責問仙  
 人亦如前答我是修忍辱人如是次斬兩足復截兩  
 耳又割其鼻一一責問答皆如前令仙人身七分墮  
 地作七瘡已王心便止仙人告言王今何故自生疲  
 窦假使斷我一切身分猶如芥子乃至微塵我亦不

論

大藏經卷一百一十一

四

五

生一念瞋忿所言忍辱終無有二復發是願如汝今日我實無辜而斷我身令成七分作七瘡孔我未來世得阿耨多羅三藐三菩提時以大悲心不待汝請最初令汝修七種道斷七隨眠當知爾時忍辱仙人者卽今世尊釋迦牟尼是羯利王者卽今具壽憍陣邢是是故憍陣邢見聖諦已佛以神力除彼閻障令其憶念過去世事彼便自見爲羯利王佛爲仙人自以利劍斷佛七支作七瘡孔佛不瞋恨反以誓願欲饒益之故佛世尊三問解不此意問言我豈違背昔願豈不如本誓願已酬滿耶時憍陣邢極懷恥愧合掌恭敬亦三答已解此意答言實知世尊不違昔願如本誓願皆已酬滿我本愚癡作斯極惡惟願哀愍赦我重罪是故爲滿本願佛三問之有說世尊顯已說法有善巧力故三問之謂此意言我於三無數劫修無量百千難行苦行所證得法由巧說故令彼須臾卽得悟解是故三問有說世尊令餘四人聞生勇勵速入見道故三問之有說世尊欲顯善說法中師及弟子於所證法審諦真實離增上慢不同外道於未得法起增上慢謂爲已得是以三問問佛初轉法輪時有八萬諸天亦同見法何故但說爲憍陣邢等

論

大毗婆沙論卷一百一十一

二五

五人轉法輪耶答此中但說正所爲者諸天因五人故得聞非正所爲是以不說有說人先見法故偏說之有說人見現見天非現見有說佛與人趣身相威儀所作悉同天則不爾有說若於是處名爲法滅卽於是處名轉法輪謂雖天中有證甘露若人中無便名法滅是故但說爲人轉法輪有說人中佛弟子有四衆差別天中不爾有說佛轉法輪以人爲證不以天證有說人中有能轉者及所爲者是以說之天中惟有所爲無能轉者是故不說有說人中能得種種殊勝功德天中不爾是故但說爲人轉法輪

## 阿毗達磨大毗婆沙論卷第一百八十二

說一部發智

音釋

轂

轂古祿切輻所湊也

痴

女黠

喎

乙骨

趨

七逾

車

織文

切

車

制

力

切

制

制

制

制

制

制

劇

奇逆

切

劇

尤甚

也

勵

勉

勉

勉

勉

勉

勉

桐城弟子趙士先施貴刻此  
阿昆達磨大毗婆沙論第一百八十二卷計  
字六千三百三十箇該銀三兩一錢六分五厘  
雙足庵釋真福對長洲徐普書進賢洪以信刻  
萬曆丙辰歲孟秋七月徑山化城識

論

解

大藏經論卷一百八十三

三

阿毗達磨大毗婆沙論卷第一百八十三

五百大阿羅漢等造

定蘊第七中不還納息第四之十

轉法輪已地神唱聲展轉宣告乃至廣說問會中亦有餘天神衆發聲相告何緣但說地神唱聲答由彼地神先發聲故問地神何故先發聲耶答以彼最近佛所住故復次彼恒隨佛而作衛故謂從菩薩處胎初生踰城出家及修苦行乃至成佛轉法輪時恒隨衛護令無留難今見如來轉法輪已歡喜踊躍自慶

先來所施功勞今得果滿故先唱告復次時會雖有  
餘天神衆而彼地神性輕躁故是以先唱如今衆中  
性輕躁者多喜高聲彼亦如是復次地神性多喜愛  
見此希有極懷歡喜故先發聲復次此是近遠次第  
法故謂地神先唱次虛空神次四大王衆天如是展  
轉經須臾頃聲至梵世問聲是刹那性若此處生必  
此處滅云何可說至梵世耶答依展轉義故作是說  
謂地神唱已虛空神唱展轉宣告乃至梵天如然燈  
法展轉增廣有說轉法輪時無量天衆皆悉來集既  
聞法已各還所住宣告自部故說展轉聲至梵世有

說彼時發聲亦無決定先後但是說者敘述次第法  
應如是故作是說地神先唱乃至廣說如契經說轉  
輪王出世時聲至他化自在天佛爲憍陳那等轉法  
輪時聲至梵世佛得阿耨多羅三藐三菩提時聲至  
色究竟天問何故如是三種差別答轉輪王出世時  
以十善法教導有情此法必於欲界天中受異熟果  
六欲天衆皆生歡喜我等眷屬不久增多是故輪王  
出世聲至他化自在天梵天王請佛轉法輪彼聞佛  
轉法輪深慶隨喜是故轉法輪時聲至梵世淨居天  
覺悟菩薩令踰城出家求無上智彼聞菩薩得阿耨

多羅三藐三菩提極懷喜慰是故初成佛時聲至色究竟天復次轉輪王是受欲者故出世時聲極欲界不至離欲地佛轉法輪時於一衆會有尊卑勝劣此事惟至梵世是故轉法輪時聲至梵天惟有如來名聲高遠無所不至是故佛得無上菩提時其聲偏及所應至處乃至色究竟天設當有頂有情有耳識者聲亦徹彼所以者何如來久修名稱業故復次諸有情類造作增長大名稱業有上中下下者如轉輪王中者如憍陣那等上者謂佛是故於彼聲有近遠復次諸有情類造作增長淨尊貴業有上中下下者如

轉輪王中者如憍陣那等上者謂佛是故聲至有近有遠尊者世友說曰諸有情類恭敬讚歎父母師長沙門婆羅門佛獨覺及佛弟子身語意業有上中下下者如轉輪王中者如憍陣那等上者謂佛是故聲至三處不同問上地亦有聲何故轉法輪時聲惟至梵世答語表業聲惟至彼故復次語言行惟至彼地語言行者所謂尋伺復次乃至彼地得有耳識非上地故有說惟至梵世得具起善染污無覆無記語有表聲非上地故復次惟至梵世得具起善染污無覆無記耳識現前非上地故有說若處有眾生差別轉

法輪時聲則至彼復次若處作三千世界分齊者聲  
至於彼有說梵世是世間有情所尊重處是故轉法  
輪時聲但至彼復有說者上地諸天亦名爲梵是故  
轉法輪時聲至梵世者不惟至初靜慮地問佛所說  
法盡名法輪耶答不也惟令入見道者乃名法輪問  
若爾聞佛說法入見道者多何故不皆名法輪耶答  
彼一切雖皆是法輪而最初最後得正解者說爲法  
輪初謂憍陣那等後謂蘇跋達羅問一切佛轉法輪  
處爲定不耶若定者然燈佛本事當二何通如說然  
燈佛於燈光城喝利多羅山轉正法輪乃至廣說若

不定者達摩蘇部底所說頌云何通如說

應念過去佛 於此迦尸宮 仙論施鹿林  
亦初轉妙法

有說應言轉法輪處定問若爾然燈佛本事當云何  
通答此不必須通所以者何此非素怛纜毗柰耶阿  
毗達磨所說但是傳說諸傳所說或然不然若必欲  
通者應知過去燈光城卽是今婆羅痆斯過去喝利  
多羅山卽是今仙人鹿苑若作是說佛轉法輪處定  
者彼說有四處定二處不定四處定者謂菩提樹處  
轉法輪處天上來下處現大神變處二處不定者謂

佛生處及般涅槃處云何得知菩提樹處定答曾聞過去有轉輪王導從四兵飛空而過至菩提樹上其輪便止欲前不得王遂惶恐作是思惟我今將無欲失王位或命難耶時菩提樹神卽白王曰大王勿怖王不失位亦無命難王不見下菩提樹耶此中有金剛座一切菩薩皆於此座證得無上正等菩提王欲過者可避此處從餘道往時王便下種種供養菩提樹已從餘道去以是事故知菩提樹處定轉法輪處定者如前所引法善現頌復云何知天上来下處定答曾聞佛去世後此處有難事起諸苾芻等並皆捨

去外道異學來居其中後諸苾芻來索其處語外道曰此是我師天上来處可速避去諸外道言此是我等常所住處因此二衆大興鬪諍近住城中長者居士諸官僚等來解其諍而不能得乃至王自解之亦不能定時諸苾芻告外道曰今當與汝俱設誠言應屬誰者當有瑞相外道言爾彼遂先請而空無驗苾芻卽復作誠諦言此處若是一切如來昇三十三天爲慈母說法經三月已下來處者當現瑞相時彼住處大石柱上有石獅子卽便哮吼外道驚恐卽時捨去從獅子口復出衆寶華蔓纏繞石柱皆悉周徧時

衆觀者歎未曾有於是苾芻遂共居止以是故知佛從天上来下處定復云何知現大神變處定答曾聞外道於六天城被佛追尋無所投跡遂共聚集請與如來揭其神變佛皆不許後至室羅伐悉底城方始許可爲現神變無量外道歸佛出家以此故知現大神變處定有說諸佛轉法輪處不定所以者何若溫達洛迦曷邏摩子及頰邏茶迦邏摩不命終者佛豈捨摩揭陀國往婆羅痖斯故知但隨應初聞法者所在卽於彼處而轉法輪問若爾法善現頌當云何通答此不必須通所以者何此非素怛纜毗柰耶阿毗

達磨所說但是文頌夫造文頌或增或減若必欲通者過去亦曾有佛於此初轉法輪非謂一切故非決定若作是說轉法輪處不定者彼說有三處定三處不定三處定者謂菩提樹處天上來下處現大神變處三處不定者謂生處轉法輪處般涅槃處如所說佛於婆羅痖斯仙人論處施鹿林中爲憍陳那等轉正法輪問何故名婆羅痖斯答此是河名去其不遠造立王城是故此城亦名婆羅痖斯問何故名仙人論處答若是說諸佛定於此處轉法輪者彼說佛是最勝仙人皆於此處初轉法輪故名仙人論處若

作是說諸佛非定於此轉法輪者彼說應言仙人住處謂佛出世時有佛大仙及聖弟子仙衆所住佛不出世時有獨覺仙所住若無獨覺時有世俗五通仙住以此處恒有諸仙已住今住當住故名仙人住處有說應言仙人墮處昔有五百仙人飛行空中至此遇退因緣一時墮落問何故名施鹿林答恒有諸鹿遊止此林故名鹿林昔有國王名梵達多以此林施與羣鹿故名施鹿林如羯蘭鐸迦長者於王舍城竹林園中穿一池以施羯蘭鐸迦鳥令其遊戲因名施羯蘭鐸迦池此亦如是故名施鹿林云何正法答無漏根力覺支道支問何故作此論答爲欲分別契經義故如伽他說

三世三佛陀 能破諸愁毒 彼皆重正法

恒住於法性

又契經說有二補特伽羅能住持正法謂說者行者毗柰耶說我之正法應住千歲或復過此由度女人出家更減五百世尊雖於處處說正法言而不分別云何正法契經是此論所依根本彼所未說者今應說之故作斯論問有漏根力道支是正法不若是者此中何故不說若非者何故無漏是正法有漏非耶

有說彼亦是正法問此中何故不說答應說而不說者當知此義有餘復次有漏根等是無漏加行若說根本則已攝加行故不別說復次有漏根等是無漏加行故亦名無漏是故已攝在前所說中有說有漏根等非是正法問何故無漏是正法有漏非耶答以有漏法有過患故要無過患乃名正法復次是清淨是可稱讚名爲正法有漏法與此相違故非正法復次正法者能永出生死得般涅槃有漏不爾故不名正法問念住正斷神足爲亦是正法不若是者此中何故不說若非者何故根力覺支道支是正法念住等非耶答彼亦是正法問若爾此中何故不說答應說而不說者當知此義有餘復次若說根等則於此文隨順念住等非順此文是故不說復次念住正斷神足皆亦攝在此所說中謂四念住卽慧根慧力擇法覺支正見所攝四正斷卽精進根精進力精進覺支正勤所攝四神足卽定根定力定覺支正定所攝齊何當言正法住答若時行法者住齊何當言正法滅答若時行法者滅問何故復作此論答爲欲分別契經義故如契經說迦葉波當知如來所覺所說法毗奈耶非地界水界火界風界所能滅沒然有一類

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

補特伽羅當出於世惡欲惡行成就惡法非法說法  
 法說非法非毗奈耶說毗奈耶於毗奈耶說非毗奈  
 耶彼能滅我三無數劫所集正法令無有餘契經雖  
 作是說而不分別齊何當言正法住齊何當言正法  
 滅彼經是此論所依根本彼所不分別者今應分別  
 故作斯論此中有二種正法一世俗正法二勝義正  
 法世俗正法謂名句文身卽素怛纜毗奈耶阿毗達  
 磨勝義正法謂聖道卽無漏根力覺支道支行法者  
 亦有二種一持教法二持證法持教法者謂讀誦解  
 說素怛纜等持證法者謂能修證無漏聖道若持教

者相續不滅能令世俗正法久住若持證者相續不  
 滅能令勝義正法久住彼若滅時正法則滅故契經  
 說我之正法不依墻壁柱等而住但依行法有情相  
 繼而往問何故世尊不決定說法住時分耶答欲顯  
 正法隨行法者住久近故謂行法者若行正行恒如  
 佛在世時及如滅度未久時者則佛正法常住於世  
 無有滅沒若無如是行正法者則彼正法速疾滅沒  
 如佛告阿難陀言於我善說法毗奈耶中若當不度  
 女人出家者我之正法應住千歲或復過此由度女  
 人出家故令我正法滅五百歲問若正法住猶滿千

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

年何故世尊作如是說答此依解脫堅固密意而說謂若不度女人出家應經千歲解脫堅固而今後五百歲惟有戒聞等持堅固非解脫者皆是度女人出家之過失耳有餘師說此依若不行入尊重法密意而說謂若度女人出家不令行入尊重法者則佛正法應減五百歲住由佛令彼行入尊重法故正法住世還滿千年間如來正法云何滅耶答如來正法將欲滅時此瞻部洲當有二王出世一王有法二王無法其有法者生在東方威德慈仁伏五印度其無法者生在達禦尸車中性皆頑嚚憎賤佛法相與合

蹤從西侵食漸入印度轉至東方志與佛法爲大衰損隨所到處破窣堵波壞僧伽藍殺苾芻衆多聞持戒無得免者燒滅經典無有遺餘時東方王聞彼達禦尸車王侵食印度漸至東方乃率兵士與之交戰彼王軍衆卽時退走擒獲二王皆斷其命尋時遣使徧諸方維召命一切沙門釋子請都集會住我國中我當盡形供給奉施衣服飲食臥具湯藥及餘所須令無乏短於是一切瞻部洲中所有苾芻皆來集會僑餉彌國時王日日設五年會種種供養然諸苾芻由多得利養故及由多有先爲活命而出家故不

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9 80 1

100

80

能精勤讀誦經典不樂獨處靜慮思惟晝則羣聚談說世事擾動喧雜夜則疲怠耽著睡眠無所覺察由此於佛所有教誡皆悉慢緩而不遵行是時瞻部洲中惟有二行法者一是阿羅漢名蘇刺多一是三藏室史迦亦名般株而爲衆首卽於是日正法將滅日初分時憍餉彌城中王爲上首五百淨信長者同時造立五百僧伽藍以彼先聞法將滅故舉手議言佛涅槃時以法付囑二部弟子一者在家二者出家勿謂今由在家弟子不能給施諸出家人令乏短故正法滅沒但由仁等出家弟子無正行故令正法滅有說如待客法初及後時皆設豐膳如是正法初出現時及後將滅皆致豐厚資緣供養有說彼作是念乃至佛法未滅世間猶有無量福田佛法若滅世間但有有量福田我等幸因佛法未滅當共及時作所應作有說釋迦爲菩薩時見過去佛或由資緣闕故或由遭疾疫故令正法滅卽時發願願我成佛勿由此事今法滅盡故法雖滅而資緣豐厚住處增廣是夜僧伽藍內爲布灑他故無量苾芻皆共聚集時悅衆者請衆首三藏室史迦爲衆說般羅底木又三藏許之而欲略說時阿羅漢蘇刺多從座而起偏袒一

肩頂禮三藏合掌白言惟願上座爲衆廣說三藏答  
 言於此衆中誰能具行般羅底木又戒而請我廣說  
 阿羅漢曰如佛在世諸苾芻等於諸學處所行邊際  
 我皆能行若此名爲能具行者願爲廣說作是語時  
 三藏弟子生大瞋恚卽叱之言是何必芻故於衆前  
 違反我師不受教誨尋共害彼阿羅漢命勝義正法  
 從斯滅沒時有敬重彼阿羅漢天龍藥叉興大瞋忿  
 殺彼三藏有說卽彼阿羅漢弟子爲執仇故害三藏  
 命有說王聞彼阿羅漢無辜被殺追戀懊惱而殺三  
 藏世俗正法從斯滅沒爾時世間勝義世俗二種正  
 法皆滅沒已經七晝夜天地冥闇而其世間猶故未  
 知正法已滅所以者何由佛往昔爲菩薩時好掩他  
 惡亦不舉他所隱覆事由此業故法滅七日無有知  
 者過七日已大地震動殞星雨火燒諸方維空中天  
 鼓發聲振吼甚可怖畏天魔眷屬生大歡喜於虛空  
 中張大白蓋空中復有大聲唱言釋迦大仙所有正  
 法從今永滅更無能入正性離生妙甘露門於斯永  
 閉大苦黑闇徧滿世間更無救護將導之者有作是  
 說爾時一切律儀羯磨結界皆捨如是說者從此已  
 後更無結界羯磨受戒然先所有今時不捨或有諸

論

大藏經卷一百一十三

三

三

佛未般涅槃正法便滅或有諸佛般涅槃後經於七日正法便滅然我世尊釋迦牟尼般涅槃後乃至千歲正法方滅彼未般涅槃及般涅槃已經於七日正法滅者依更無有入正性離生說名爲滅釋迦如來正法滅者依甘露界斷說名爲滅雖天中猶有甘露界在然依人中滅故名滅問何故過去諸佛有未般涅槃正法卽滅有於般涅槃後七日卽滅今釋迦佛千歲方滅耶答過去諸佛壽量長遠於彼正教所應作者佛在世時多已究竟故法速滅今世尊釋迦牟尼出百年時壽量短促正教所作雖佛涅槃多未究竟乃至千歲於中有種善根者有成熟者有解脫者是故經於多時正法方滅有說過去諸佛所有弟子愛重奢摩他非毗鉢舍那由重奢摩他故恒住寂止不樂傳說契經等十二分教故法速滅今世尊弟子愛重毗鉢舍那非奢摩他由重毗鉢舍那故多住觀察皆樂傳授契經等十止分教是故正法多時乃滅問正法滅已無得聖者耶答亦有從預流果得一來果從一來果得不還果從不還果得阿羅漢果而無從順決擇分入正性離生者惟由此故名正法滅若初入無漏初靜慮乃至廣說問何故作此論答欲止

他宗顯已義故謂或有說無未來修聖有說聖道是無爲或有說聖道是一爲止彼意顯有未來修亦顯聖道是有爲而非是一故作斯論若無未來修者則功德法無增益義佛盡智時應不具一切智若聖道是無爲者便不可修以無爲法非所修故若聖道是一者則無三世差別經不應說有三世佛等問若聖道是有爲而非一者何故經說我證得舊道惟一無二答由五因緣故作是說謂加行相似行相相似等廣說如智蘊若初入無漏初靜慮由得此故得諸餘無漏心心所法彼何世攝答未來若初入乃至無漏無所有處由得此故得諸餘無漏心心所法彼何世攝答未來凡中初者有四種一入正性離生初二得果初三離染初四轉根初廣說如智蘊未來生時說名爲得若至現在名爲已得故今得者是說生時諸生何世攝乃至廣說問何故作此論答欲止他宗顯已義故謂譬喻者說有爲法但有二時一未生時二已生時除此更無正生正滅今顯實有正生正滅時故作此論復次爲止撥無去來世執現在是無爲法今說未來有生現在有滅故卽顯去來非無而現在是有爲故作斯論復次爲止執有爲法惟轉變隱顯

而體無生滅今說未來生現在滅故卽顯有爲法非但轉變而實有生滅故作斯論諸生何世攝答未來諸滅何世攝答現在以未來名正生現在名正滅現在名已生過去名已滅故

### 定蘊第七中一行納息第五之一

三三摩地謂空無願無相乃至廣說問何故作此論答爲欲分別契經義故如契經說有三三摩地所謂空無願無相契經雖作是說而不分別若成就空彼無願耶如是等彼經是此論所依根本彼所不說者今應說之故作斯論復次爲止撥無不成就性說成

就性但是假有欲顯成就不成就性俱是實有故作斯論復次爲止撥無去來二世執現在是無爲法顯有二世現是有爲故作斯論若成就空彼無願耶答如是設成就無願彼空耶答如是以此二三摩地俱時得故同對治故俱時得者謂若依空三摩地入正性離生苦現觀四心頃亦得無願若依無願三摩地入正性離生苦現觀四心頃亦得空及於修道無學道中若得一必具二同對治者謂彼俱能對治見若所斷煩惱及修所斷雖於見道集現觀四心頃道現觀三心頃時得無願非空而先於不成就得成就時

必俱得故恒俱成就若成就空彼無相耶答若得此中得謂已得卽滅法智忍已生此後恒成就無相設成就無相彼空耶答如是以成就無相時必先得空故若成就無願彼無相耶答若得設成就無相彼無願耶答如是此如以空對無相說若成就過去空彼未來耶答如是問此說在何位答此說依空三摩地入正性離生苦現觀三心頃集滅現觀各四心頃道現觀三心頃及得預流果乃至阿羅漢果若信勝解練根作見至時解脫阿羅漢練根作不動彼空三摩地已起滅不失設成就未來空彼過去耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說若依空三摩地入正性離生苦現觀一心頃若依無願三摩地入正性離生苦集滅現觀各四心頃道現觀三心頃及得預流果乃至阿羅漢果若信勝解練根作見至時解脫練根作不動空三摩地未已起滅已起滅者由得果轉根故失若成就過去空彼現在耶答若現在前謂不起無願或無相或有漏心亦非無心故言若現在前問此說在何位答此說依空三摩地

入正性離生苦現觀三心頃及得預流果乃至阿羅漢果若信勝解練根作見至時解脫練根作不動空三摩地已起滅不失及現在前設成就現在空彼過去耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說依空三摩地入正性離生苦現觀一心頃及得預流果乃至阿羅漢果若信勝解練根作見至時解脫練根作不動空三摩地現在前而未已滅先已滅者由得果轉根故失若成就未來空彼現在耶答若現在前謂不起無願或無相或有漏心亦非無心故言若現在前問此說在何位答此說依空三摩地入正性離生苦現觀四心頃及得預流果乃至阿羅漢果若信勝解練根作見至時解脫練根作不動空三摩地現在前設成就現在空彼未來耶答如是問此說在何位答此說卽前所說諸位若成就過去空彼未來現在耶答未來成就現在若現在前問此說在何位答此說依空三摩地入正性離生苦現觀三心頃及得預流果乃至阿羅漢果若信勝解練根作見至若時解脫練根作不動空三摩地已起滅不

失亦現在前設成就未來現在空彼過去耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者如前現在對過去說若成就未來空彼過去現在耶答有成就未來空非過去現在有及過去非現在有及現在非過去有及過去現在成就未來空非過去現在者謂已得空未已滅設已滅而失不現在前問此說在何位答此說依無願三摩地入正性離生苦集滅現觀各四心頃道現觀三心頃及得預流果乃至阿羅

漢果若信勝解練根作見至若時解脫練根作不動空三摩地未已起滅先已起滅者由得果轉根故失亦不現在前及過去非現在者謂空已滅不失不現在前問此說在何位答此說依空三摩地入正性離生集滅現觀各四心頃道現觀三心頃及得預流果乃至阿羅漢果若信勝解練根作見至若時解脫練根作不動空三摩地已起滅不失不現在前及現在非過去者謂空現在前未已滅設已滅而失問此說在何位答此說依空三摩地入正性離生苦現觀一心頃及得預流果乃至阿羅漢果若信勝解練根作

論語

大藏經卷一百一十三

卷一百一十三

自三

見至時解脫練根作不動空三摩地未已起滅先已  
起滅者由得果轉根故失而現在前及過去現在者  
謂空已滅不失現在前問此說在何位答此說依空  
三摩地入正性離生苦現觀三心頃及得預流果乃  
至阿羅漢果若信勝解練根作見至時解脫練根作  
不動空三摩地已起滅不失亦現在前設成就過去  
現在空彼未來耶答如是此說卽前所說諸位設成  
就過去現在必成就未來故若成就現在空彼過去  
未來耶答未來成就過去若已滅不失則成就若未  
已滅設已滅而失則不成就未來成就者如前現在

對未來說過去若已滅不失等者如前現在對過去  
說設成就過去未來空彼現在耶答若現在前此前如  
前未來對現在說差別者此中必成就過去如空歷  
作六句應知無願無相亦爾隨其所應盡當知

阿毗達磨大毗婆沙論卷第一百八十三

音釋

躁則到切不  
安靜也 捂音角  
校也 懈莫結  
忠信之言曰 蔽魚巾切口不道  
智部發智

相城弟子趙士先施貴刻此

字七千五百四十二箇該銀三兩七錢七分計

阿彌達磨大毗婆沙論

長洲徐普書上石至文

阿彌達磨大毗婆沙論卷一百八十四

五百大阿羅漢等造

龍未來擇取五德去中及取空靈  
篋處掠去未來空靈取五德去前也咬  
擇未來篋處去菩薩不夫等音咬前取五德去

阿彌達磨大毗婆沙論卷第一百八十四

五百大阿羅漢等造

唐三藏法師玄奘奉詔譯

定蘊第七中一行納息第五之二

若成就過去空彼過去無願耶答若已滅不失則成  
就若未已滅設已滅而失則不成就問此說在何位  
答若已滅不失則成就者此說依空三摩地入正性  
離生集現觀三心頃滅現觀四心頃道現觀三心頃  
及得預流果阿羅漢果時解脫練根作不動空三摩  
地已起已滅若得一來果不還果信勝解練根作見

論

大田等流句解卷二十一

白

至空無願三摩地已起已滅若未已滅設已滅而失則不成就者此說依空三摩地入正性離生苦現觀三心頃集現觀一心頃及得一來果不還果信勝解練根作見至空三摩地已起滅不失無願三摩地未已起滅先已起滅者由得果轉根故失設成就過去無願彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此位如答次前問說若未已滅設已滅而失則不成就者此說依無願三摩地入正性離生苦現觀三心頃集滅現觀各四心頃道現觀三心頃及得預流果乃至阿羅漢果若信勝解練根作見至時解脫練根作不動無願三摩地已起滅不失空三摩地未已起滅先已起滅者由得果轉根故失若成就過去空彼未來無願耶答如是此二決定俱時得故問此說在何位答此說依空三摩地入正性離生苦現觀三心頃集滅現觀各四心頃道現觀三心頃若得預流果乃至阿羅漢果若信勝解練根作見至時解脫練根作不動空三摩地已起滅不失設成就未來無願彼過去空耶答若已滅不失則成就若未已滅設已滅而失則不成就問此說在何位答若已

論

大藏經卷第百八十四

三

四

滅不失則成就者此說卽前所說諸位若未已滅設已滅而失則不成就者此說若依空三摩地入正性離生苦現觀一心頃若依無願三摩地入正性離生苦集滅現觀各四心頃道現觀三心頃及得預流果乃至阿羅漢果若信勝解練根作見至時解脫練根作不動空三摩地未已起滅先已起滅者由得果轉根故失若成就過去空彼現在無願耶答若現在前謂若不起空或無相或有漏心亦非無心故言若現在前問此說在何位答此說依空三摩地入正性離生集現觀四心頃道現觀三心頃及得預流果乃至

阿羅漢果若信勝解練根作見至時解脫練根作不動空三摩地已起滅不失無願現在前設成就現在無願彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說依無願三摩地入正性離生苦集現觀各四心頃道現觀三心頃及得預流果乃至阿羅漢果若信勝解練根作見至時解脫練根作不動空三摩地未已起滅先已起滅者由得果轉根故失無願現在前若成就過去空彼過去現在無願

論

大般涅槃經卷二十一

三

四

耶答有成就過去空非過去現在無願有及過去非現在有及現在非過去有及過去現在成就過去空非過去現在無願者謂空已滅不失無願未已滅設已滅而失不現在前問此說在何位答此說依空三摩地入正性離生苦現觀三心頃及得一來果不還果信勝解練根作見至空三摩地已起滅不失無願未已起滅先已起滅者由得果轉根故失亦不現在前及過去非現在者謂空無願已滅不失無願不現在前問此說在何位答此說依空三摩地入正性離生滅現觀四心頃及得預流果乃至阿羅漢果若信勝解練根作見至時解脫練根作不動空無願三摩地已起滅不失無願不現在前及現在非過去者謂空已滅不失無願現在前未已滅設已滅而失問此說在何位答此說若依空三摩地入正性離生集現觀一心頃及得一來果不還果信勝解練根作見至空三摩地已起滅不失無願未已起滅先已起滅者由得果轉根故失而現在前及過去現在者謂空無願已滅不失無願現在前問此說在何位答此說依空三摩地入正性離生集道現觀各三心頃及得預流果乃至阿羅漢果若信勝解練根作見至時解脫

練根作不動空無願三摩地已起滅不失無願現在前設成就過去現在無願彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說依無願三摩地入正性離生苦現觀三心頃集現觀四心頃道現觀三心頃及得預流果乃至阿羅漢果若信勝解練根作見至時解脫練根作不失無願三摩地已起滅不失空三摩地未已起滅先已起滅者由得果轉根故失無願現在前若成就過去空彼未來現在無願耶答未來成就現在若現在前問此說在何位答此說依空三摩地入正性離生集現觀四心頃道現觀三心頃及得預流果乃至阿羅漢果若信勝解練根作見至時解脫練根作不動空三摩地已起滅不失無願現在前設成就未來現在無願彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說依無願三摩地入正性離生苦集現觀各四心頃道現觀三心頃及得預流果乃至阿羅漢果若

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

信勝解練根作見至時解脫練根作不動空三摩地  
 未已起滅先已起滅者由得果轉根故失無願現在  
 前若成就過去空彼過去未來無願耶答未來成就  
 過去若已滅不失則成就若未已滅設已滅而失則  
 不成就問此說在何位答未來成就過去若已滅不  
 失則成就者此說依空三摩地入正性離生集現觀  
 三心頃減現觀四心頃道現觀三心頃及得預流果  
 阿羅漢果時解脫練根作不動空三摩地已起滅不  
 失若得一來果不還果信勝解練根作見至空無願  
 三摩地已起滅不失若未已起滅設已起滅而失則  
 不成就者此說依空三摩地入正性離生苦現觀三  
 心頃集現觀一心頃及得一來果不還果信勝解練  
 根作見至空三摩地已起滅不失無願未已起滅先  
 已起滅者由得果轉根故失設成就過去未來無願  
 彼過去空耶答若已滅不失則成就若未已滅設已  
 滅而失則不成就問此說在何位答若已滅不失則  
 成就者此位如答次前問說若未已滅設已滅而失  
 則不成就者此說依無願三摩地入正性離生苦現  
 觀三心頃集減現觀各四心頃道現觀三心頃及得  
 預流果乃至阿羅漢果若信勝解練根作見至時解

論

卷之二十一

大

目次

脫練根作不動無願三摩地已起滅不失空未已起減先已起滅者由得果轉根故失若成就過去空彼過去未來現在無願耶答有成就過去空及未來無願非過去現在有及未來現在非過去有及過去未來非現在有及過去未來現在成就過去空及未來無願非過去現在者謂空已滅不失無願未已滅設無願非過去現在者謂空已滅不失無願未已滅設已滅而失不現在前問此說在何位答此說依空三摩地入正性離生苦現觀三心頃及得一來果不還果信勝解練根作見至空三摩地已起滅不失無願未已起滅先已起滅者由得果轉根故失亦不現在前及未來現在非過去者謂空已滅不失無願現在前非已滅設已滅而失問此說在何位答此說依空三摩地入正性離生集現觀一心頃及得一來果不還果信勝解練根作見至空三摩地已起滅不失無願未已起滅先已起滅者由得果轉根故失而現在前及過去未來非現在者謂空無願已滅不失無願不現在前問此說在何位答此說若依空三摩地入正性離生滅現觀四心頃及得預流果阿羅漢果時解脫練根作不動空三摩地已起滅不失無願不現在前若得一來果不還果信勝解練根作見至空無

論

大藏經論卷二十一

十一

目次

願三摩地已起滅不失無願不現在前及過去未來現在者謂空無願已滅不失無願現在前問此說在何位答此說依空三摩地入正性離生集道現觀各三心頃及得預流果阿羅漢果時解脫練根作不動空三摩地已起滅不失無願現在前若得一來果還果信勝解練根作見至空無願已起滅不失無願現在前設成就過去未來現在無願彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說若依無願三摩地入正性離生苦現觀三心頃集現觀四心頃道現觀三心頃及得預流果乃至阿羅漢果若信勝解練根作見至時解脫練根作不動無願已起滅不失空未已起滅先已起滅者由得果轉根故失無願現在前若成就過去空彼過去無相耶答若已滅不失則成就若未已滅設已滅而失則不成就問此說在何位答若已滅不失則成就者此說依空三摩地入正性離生滅道現觀各三心頃及得預流果乃至阿羅漢果若信勝解練根作見至時解脫練根作不動空無相已起滅不失若未已滅設已

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

滅而失則不成就者此說依空三摩地入正性離生苦現觀三心頃集現觀四心頃滅現觀一心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相未已起滅先已起滅者由得果轉根故失設成就過去無相彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此位如答次前問說若未已滅設已滅而失則不成就者此說依無願三摩地入正性離生滅道現觀各三心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相已起滅不失空未已起滅先已起滅者由得果轉根故失若成就過去空彼未來無相耶答若得此謂已得名得卽滅法智忍已生問此說齊何位答此說依空三摩地入正性離生滅現觀四心頃道現觀三心頃及得預流果乃至阿羅漢果若信勝解練根作見至時解脫練根作不動空三摩地已起滅不失設成就未來無相彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而

論

大藏經論卷一百八十四

九

自四

失則不成就者此說依無願三摩地入正性離生滅現觀四心頃道現觀三心頃及得預流果乃至阿羅漢果若信勝解練根作見至時解脫練根作不動空三摩地未已起滅先已起滅者由得果轉根故失若成就過去空彼現在無相耶答若現在前謂不起空或無願或有漏心亦非無心故言若現在前問此說在何位答此說若依空三摩地入正性離生滅現觀四心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相現在前設成就現在無相彼過去空耶答若已

滅不失則成就若未已滅設已滅而失則不成就問此說在何位答已滅不失則成就者此說卽前所說諸位若未已滅設已滅而失則不成就者此說若依無願三摩地入正性離生滅現觀四心頃及得預流果乃至阿羅漢果若信勝解練根作見至時解脫練根作不動空三摩地未已起滅先已起滅者由得果轉根故失無相現在前若成就過去空彼過去現在無相耶答有成就過去空非過去現在無相有及過去非現在有及現在非過去有及過去現在成就過去空非過去現在無相者謂空已滅不失無相未已

論

大智度論卷一百一十四

十一

白四

滅設已滅而失不現在前問此說在何位答此說依空三摩地入正性離生苦現觀三心頃集現觀四心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相未已起滅先已起滅者由得根故失亦不現在前及過去非現在者謂空無相已滅不失無相不現在前問此說在何位答此說依空三摩地入正性離生道現觀三心頃及得預流果乃至阿羅漢果若信勝解練根作見至時解脫練根作不動空無相已起滅不失無相不現在前及現在非過去者謂空已滅

不失無相現在前未已滅設已滅而失問此說在何位答此說依空三摩地入正性離生滅現觀一心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相未已起滅先已起滅者由得果轉根故失無相現在前及過去現在者謂空無相已滅不失無相現在前問此說在何位答此說依空三摩地入正性離生滅現觀三心頃及得預流果乃至阿羅漢果若信勝解練根作見至時解脫練根作不動空無相已起滅不失無相現在前設成就過去現在無相彼過去空耶答

論  
天阿摩沙論卷一百八十四

二

自四

若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說依無願三摩地入正性離生滅現觀三心頃及得預流果乃至阿羅漢果若信勝解練根作見至時解脫練根作不動空三摩地未已起滅先已起滅者由得果轉根故失無相已起滅不失亦現在前若成就過去空彼未來現在無相耶答有成就過去空非未來現在無相有及未來非現在有及未來現在成就過去空非未來現在無相者謂空已滅不失未得無相與已得相違說名未得卽滅法智忍未已生時間此說齊何位答此說依空三摩地入正性離生苦現觀三心頃集現觀四心頃非餘位以彼必成就未來無相故及未來非現在者謂空已滅不失已得無相不現在前問此說在何位答此說依空三摩地入正性離生道現觀三心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相不現在前及未來現在者謂空已不失無相現在前問此說在何位答此說依空三摩地入正性離生滅現觀四心頃及得預流果乃至

論

大藏經卷一百一十四

三

自四

阿羅漢果若信勝解練根作見至時解脫練根作不動空三摩地已起滅不失無相現在前但成就現在必成就未來故不別說設成就未來現在無相彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說依無願三摩地入正性離生滅現觀四心頃及得預流果乃至阿羅漢果若信勝解練根作見至時解脫練根作不動空三摩地未已起滅先已起滅者由得果轉根故失無相現在前若成就過去空彼過去未來無相耶答有成就過去空非過去未來無相有及未來非過去有及過去未來成就過去空非過去未來無相者謂空已滅不失未得無相問此說在何位答此說依空三摩地入正性離生苦現觀三心頃集現觀四心頃及未來非過去者謂空已滅不失已得無相未已滅設已滅而失問此說在何位答此說依空三摩地入正性離生滅現觀一心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相未已起滅先已起滅者由得果轉根故失及過去未來

者謂空無相已滅不失問此說在何位答此說依空三摩地入正性離生滅道現觀各三心頃及得預流果乃至阿羅漢果若信勝解練根作見至時解脫練根作不動空無相已起滅不失設成就過去未來無相彼過去空耶答若已滅不失則成就若未已滅設已滅而失則不成就問此說在何位答若已滅不失則成就者此說卽前所說諸位若未已滅設已滅而失則不成就者此說依無願三摩地人正性離生滅道現觀各三心頃及得預流果乃至阿羅漢果若信勝解練根作見至時解脫練根作不動無相已起滅

不失空未已起滅先已起滅者由得果轉根故失若成就過去空彼過去未來現在無相耶答有成就過去空非過去未來現在無相有及未來非過去現在有及未來現在非過去有及過去未來非現在有及過去未來現在成就過去空非過去未來現在無相者謂空已滅不失未得無相問此說在何位答此說依空三摩地入正性離生苦現觀三心頃集現觀四心頃及未來非過去現在者謂空已滅不失已得無相未已滅設已滅而失不現在前問此說在何位答此說若得預流果乃至阿羅漢果若信勝解練根作

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

論

大智度論卷一百一十四

廿五

四

見至時解脫練根作不動空三摩地已起滅不失無相三摩地未已起滅先已起滅者由得果轉根故失亦不現在前及未來現在非過去者謂空已滅不失無相現在前未已滅設已滅而失問此說在何位答此說依空三摩地入正性離生此滅現觀一心頃及得預流果乃至阿羅漢果若信勝解練根作見至時解脫練根作不動空三摩地已起滅不失無相未已起滅先已起滅者由得果轉根故失而現在前及過去未來非現在者謂空無相已滅不失無相不現在前問此說在何位答此說依空三摩地入正性離生道現觀三心頃及得預流果乃至阿羅漢果若信勝解練根作見至時解脫練根作不動空無相已起滅不失無相不現在前及過去未來現在者謂空無相已滅不失無相現在前問此說在何位答此說依空三摩地入正性離生滅現觀三心頃及得預流果乃至阿羅漢果若信勝解練根作見至時解脫練根作不動空無相已起滅不失無相現在前設成就過去未來現在無相彼過去空耶答若已滅不失則成就若已滅不失則成就者此說卽前所說諸位若未已

論

大藏經論卷一百一

三五

白四

滅設已滅而失則不成就者此說若依無願三摩地入正性離生滅現觀三心頃及得預流果乃至阿羅漢果若信勝解練根作已至時解脫練根作不動無相已起滅不失亦現在前空未已起滅先已起滅者由得果轉根故失如空對無相作七句應知無願對無相亦爾隨其所應盡當知如小七應知大七亦爾差別者以二對一如以過去空無願對過去無相有七有說此是大七種性故不應言對過去無相所以者何此但是一句故應作是說如以過去空無願對無相有七以此中具有七句故有說此中不應言有

七所以者何此但是大七種性故應作是說如以過去空無願對過去無相次對未來次對現在次對過去現在次對未來現在次對過去未來後對過去未來現在無相有七以此中有一七句問一七句答故有說此中所說顯於初句卽有七句所以者何此中有七七句問七七句答故如以過去空無願對過去無相作初句次對未來次對現在次對過去現在次對未來現在次對過去未來後對過去未來現在無相爲第七句復以過去空無願對未來無相作初句次對現在乃至後對過去無相爲第七句復以過去

論

大藏經論卷一百一

三六

白五

論  
六祖法傳卷一百一  
十一

十一

十一

空無願對現在無相作初句次對過去乃至後對未來無相爲第七句復以過去空無願對過去現在無相作初句次對未來現在乃至後對現在無相爲第七句復以過去空無願對未來現在無相作初句次對過去以過去空無願對過去未來無相作初句次對過去未來現在乃至後對未來現在無相爲第七句復以過去空無願對過去未來現在無相作初句次對過去過去空無願對過去未來現在無相作初句次對過去去乃至後對過去未來現在無相爲第七句復以過去空無願對過去未來現在無相作初句次對過去去乃至後對過去未來無相爲第七句若作是說則唐捐其功於文無益於義無益亦不成七七句若

欲於文有益於義有益亦成七七句者應作是說如以過去空無願對過去無相作初句次對未來次對現在次對過去現在次對未來現在次對過去未來後對過去未來現在無相爲第七句復以未來空無願對未來無相作初句次對現在乃至後對過去無相爲第七句復以現在空無願對現在無相作初句次對過去現在空無願對過去現在無相作初句復以過去現在空無願對過去現在無相作初句次對未來來現在乃至後對現在無相爲第七句復以未來現在空無願對未來現在無相作初句次對未來

乃至後對過去現在無相爲第七句復以過去未來空無願對過去未來無相作初句次對過去未來在乃至後對未來現在無相爲第七句復以過去未來現在空無願對過去未來現在無相作初句次對過去乃至後對過去未來無相爲第七句若作是說則於文有益於義有益成七七句應知諸七義則如是問此中一行歷六小七大七何差別答名卽差別此名一行乃至此名大七復次以一行道理爲問名一行以六句爲問名歷六以七句爲問以一問一名小七以七句爲問以二問一名大七復次問不相似法不以世定名一行問相似法以世定名歷六問不相似法以世定以一問一名小七問不相似法以世定以二問一名大七一行歷六小七大七是謂差別

### 阿毗達磨大毗婆沙論卷第一百八十四

說一切有部發智

桐城弟子趙士先施賈刻此

阿毗達磨大毗婆沙論第一百八十四卷 計字  
七千乙百九十一箇該銀三兩六錢  
雙足庵釋真福對長洲徐普書牒水端司堯刻  
萬曆丙辰歲仲秋八月徑山化城識

卷一百一十五

大藏經法華經卷一百一十五

七

阿毗曇大迦葉般若論一百八十四

卷一百一十五

世尊以二問一答大士一答釋六小士大士答謂  
不爾妙法以世尊以二問一答小士問不時以時以  
以時不以世尊答一旨問時妙法以世尊答釋六問

阿毗達磨大毗婆沙論卷第一百八十五

五百大阿羅漢等造

唐三藏法師玄奘奉詔譯

定蘊第七中一行納息第五之三

若修空彼無願耶乃至廣說問何故作此論答爲止  
撥無去來二世及說無未來修者意欲顯有去來世  
亦有未來修故作斯論修有四種一得修二習修三  
對治修四除遣修此中依二修作論謂得修習修若  
修空彼無願耶設修無願彼空耶答應作四句有修  
空非無願謂已得空現在前此是佛或獨覺聲聞爲

論

大般若論譜卷一百一十三

自注

現法樂住等故起已得空三摩地現在前爾時彼勢力尚不及自類無間剎那況能修餘未來功德然現前位卽是習修有修無願非空謂已得無願現在前若未得無願現在前不修空已得無願現在前者如前釋未得無願現在前不修空者謂見道中集現觀四心頃道現觀三心頃以見道中對治決定及是不共對治故不異諦修有俱修謂未得空現在前若未得無願現在前修空若未得無相及未得世俗智現在前修空無願未得空現在前者謂依空三摩地入正性離生苦現觀四心頃若依空三摩地離欲界乃至無所有處染或以空爲加行彼一切加行無間解脫道及離非想非非想處染除最後解脫道若依空三摩地信勝解練根作見至或以空爲加行彼加行無間解脫道及時解脫練根作不動除最後解脫道若依空三摩地雜修靜慮初後心頃若依空三摩地起念住無色解脫義辯二無礙解有說惟義無礙解於如是時未得空現在前亦修無願未得無願現在前修空者謂依無願三摩地入正性離生苦現觀四心頃道類智時若依無願離欲界乃至非想非非想處染或無願爲加行彼一切加行無間解脫道若依

無願信勝解練根作見至時解脫練根作不動或無願爲加行彼一切加行無間解脫道若依無願雜修靜慮初後心頃若起無漏他心智通若依無願起念住無色解脫義辯二無礙解於如是時未得無願現在前亦修空未得無相現在前修空無願者見道中無於修道無學道中若依無相離欲界乃至無所有處染或無相爲加行彼一切加行無間解脫道及離非想非非想處染除最後解脫道若依無相信勝解練根作見至或無相爲加行彼一切加行無間解脫道及時解脫練根作不動除最後解脫道若依無相

雜修靜慮初後心頃若依無相起念住無色解脫義無礙解於如是時未得無相現在前修空無願未得世俗智現在前修空無願者謂聖者以世俗道離欲界乃至無所有處染或世俗道爲加行彼一切加行無間解脫道及離非想非非想處染及信勝解練根作見至時解脫練根作不動以世俗爲加行彼加行道雜修靜慮中間心頃引發五通諸加行道五無間道二解脫道及有漏他心智通解脫道起無量世俗解脫勝處徧處不淨觀持息念世俗念住七處善三義觀世俗無礙解無諍願智邊際智空空無願無願

論

卷之三

三

五

無相無相入滅定想微細心於如是時未得世俗智現在前修空及無願有俱不修謂已得無相現在前若未得無相現在前不修空無願若已得世俗智現在前若未得世俗智現在前不修空無願一切異生染汚心無記心在無想定滅盡定生無想天已得無相現在前者如前釋未得無相現在前不修空無願者謂見道中滅現觀四心頃不修空無願如前釋已得世俗智現在前者如前釋未得世俗智現在前不修空無願者謂聖者聞思所成慧入滅定微微心一切異生者謂此中所說三三摩地惟無漏故異生皆

無故無修義染污心者謂染污心是順退分性沉重懈怠相應要順勝進性輕舉精進相應心方能修故無記心者謂無記心不堅不住不實羸劣如朽敗種要堅住實強盛心方能修故在無想定滅盡定者謂彼無心要有心位方能修故生無想天者有說生彼於一切時不起善心有說生彼雖起善心而非修所依雖前已遮一切異生而復遮無想定無想天者以彼是世俗所尚或疑有修故於如是時不修空及無願若修空彼無相耶設修無相彼空耶答應作四句有修空非無相謂已得空現在前若未得空現在前

論

大藏經論卷之五

四

自五

不修無相若未得無願現在前修空非無相已得空  
 現在前者如前釋未<sup>3</sup>空現在前不修無相者謂依  
 空三摩地入正性離生苦現觀四心頃未得無願現  
 在前修空非無相者謂依無願入正性離生苦現觀  
 四心頃有修無相非空謂已得無相現在前若未得  
 無相現在前不修空已得無相現在前者如前釋未  
 得無相現在前不修空者謂見道中滅現觀四心頃  
 有俱修謂未得空現在前修無相若未得無相現在  
 前修空若未得無願及未得世俗智現在前修空無  
 相未得空現在前修無相者謂依空三摩地離欲界  
 乃至無所有處染廣如前兼修無願說未得無相現  
 在前修空者謂依無相三摩地離欲界乃至無所有  
 處染或無相爲加行彼一切加行無間解脫道及離  
 非想非非想處染除最後解脫道若依無相練根作  
 見至以無相爲加行彼加行無間解脫道及時解脫  
 練根作不動除最後解脫道若依無相雜修靜慮初  
 後心頃若依無相起念住無色解脫義無礙解於如  
 是時未得無相現在前亦修空未得無願現在前修  
 空無相者謂道類智時若依無願三摩地離欲界乃  
 至非想非非想處染廣如前兼修空說未得世俗智

言

大藏經卷之三

三

五

現在前修空無相者謂聖者以世俗道離欲界乃至無所有處染廣如前兼修空無願說有俱不修謂已得無願現在前若未得無願現在前不修空無相若已得世俗智現在前若未得世俗智現在前不修空無相一切異生染汚心無記心在無想定滅盡定生無想天已得無願現在前者如前釋未得無願現在前不修空無相者謂見道中集現觀四心頃道現觀三心頃已得世俗智現在前者如前釋未得世俗智現在前不修空無相者謂聖者聞思所成慧入滅定微微心一切異生乃至生無想天者如前釋若修無願彼無相耶設修無相彼無願耶答應作四句有修無願非無相謂已得無願現在前若未得無願及未得空現在前不修無相已得無願現在前者如前釋未得無願現在前不修無相者謂依無願入正性離生苦現觀四心頃集現觀四心頃道現觀三心頃未得空現在前不修無相者謂依空三摩地入正性離生苦現觀四心頃有修無相非無願謂已得無相現在前若未得無相現在前不修無願已得無相現在前者如前釋未得無相現在前不修無願者謂見道中滅現觀四心頃有俱修謂未得無願現在前修無

論

大藏經論卷二十一

七

五

相若未得無相現在前修無願若未得空及未得世俗智現在前修無願無相此隨所應如前廣釋有俱不修謂已得空及已得世俗智現在前若未得世俗智現在前不修無願無相一切異生染汚心無記心在無想定滅盡定生無想天此亦隨應如前廣釋頗有結空所斷非無願無相耶乃至廣說有二種決定一對治決定二作用決定此中依對治決定而作論非作用決定所以者何無有道理三三摩地俱時作用何況有三頗有結空所斷非無願無相耶答無以無願如是類結惟是空所對治故頗有結無願所斷非空無相耶答有謂見集見道所斷結無願斷以彼惟是無願所對治故頗有結無相所斷非空無願耶答有謂見滅所斷結無相斷以彼惟是無相所對治故頗有結空無願所斷非無相耶答有謂見苦所斷結空無願斷以彼惟是空無願所對治故頗有結空無相所斷非無願耶答無以無如是類結惟是空無相所對治非無願故頗有結無願無相所斷非空耶答無以無願如是類結惟是無願無相所對治非空故頗有結空無願無相所斷耶答有謂學見跡修所斷結空無願無相斷卽彼是聖者二界修所斷結以

論

卷一百一十五

五

彼是三三摩地所對治故頗有結非空無願無相所斷而是所斷耶答有謂異生所斷結卽諸異生欲界乃至無所有處見修所斷結是世俗道所對治故問彼結豈非空無願無相所對治耶答是所對治然在聖者非異生彼在異生故說非空等斷有說前依對治決定而作論今依作用決定作論異生相續中三三摩地定無作用故說彼結非空等斷問若爾者聖相續中欲界乃至無所有處修所斷結亦世俗道斷何故但說空等斷耶答前文應說彼結亦是世俗道斷而不說者有何意耶應知聖者無漏道所顯故不

說世俗道異生無無漏道故依世俗道說是以前說無過云何作意入正性離生乃至廣說問何故作此論答欲止他宗顯已義故謂或有說三三摩地隨一皆能入正性離生今遮彼意顯惟三三摩地隨一能入而非無相故作斯論或復有說惟無相三摩地能入正性離生如達摩毘多部說彼說以無相三摩地於涅槃起寂靜作意入正性離生爲遮彼執顯惟無相三摩地不能入正性離生故作斯論云何作意入正性離生答或無常或苦或空或無我由此則止三三摩地及惟無相能入正性離生者意此中無常苦

作意與無願三摩地相應空無我作意與空三摩地相應問何故惟此行相入正性離生非餘耶答入正性離生者有二種一愛行二見行愛行者依無願入見行者依空入菩薩雖是愛行而能依空入正性離生愛行者復有二種謂我慢增懈怠增我慢增者以無常行相入懈怠增者以苦行相入見行者亦有二種謂我見增我所見增我見增者以無我行相入我所見增者以空行相入是故惟作此四行相問此四行相與何位法相應有說與世第一法相應以說入正性離生故有說與苦法智忍相應問若爾何故言

入答此說已入名入於近說遠聲如言大王從何處來彼於已來名來此亦如是問爾時亦有餘心所法何故但說作意耶答以惟作意能引發心心所故有說作意於入正性離生最隨順故思惟何繫行入正性離生乃至廣說問何故作此論答欲止尊者達磨怛邏多說頓思惟三界行入正性離生又爲止說思惟涅槃入正性離生者意故作斯論問思惟何繫行入正性離生答欲界繫由此則正如前二執問何故但思惟欲界繫行入正性離生耶答欲界苦麤顯現見易觀察故有說欲界苦是彼相續現成就故有說

論

大智度論第十二

自注

欲界繫行具三苦故是以阿毗達磨者說觀三苦諸行入正性離生非如譬喻者惟說觀行苦諸行入正性離生此中不可意諸行名苦苦可意諸行名壞苦順捨諸行名行苦有說欲界苦於修行者現爲逼惱極所厭背故先觀彼入正性離生問涅槃亦是極所欣樂何不觀彼入正性離生耶答諸有情類厭苦心勝非欣涅槃所以者何現逼惱故不現見故如諸有情無不畏苦有不貪樂問緣何諦忍後能入正性離生有說緣道諦如是說者緣苦諦廣說如雜蘊初納息盡智當言於身循身觀念住耶乃至當言於法循法觀念住耶答盡智應言或於身循身觀念住或於受或於心或於法循法觀念住如盡智無生智亦爾問何故作此論答爲令疑者得決定故謂有生如是疑盡無生智非見性故亦應非念住性今欲決定明此二智雖非見性而是念住故作斯論復次見蘊中分別見自性念住今定蘊中分別非見自性念住故作斯論復次加行地中說修念住有因此故謂無學地無有念住今欲明無學地中有念住故而作此論復次經說盡無生智緣生及後有爲境有因此故謂彼但緣生及後有今欲顯彼緣一切法惟除虛空及

論

大智度論卷一百一十五

白

非擇滅故作斯論復次有執盡無生智惟總緣五蘊今遮彼意顯盡無生智或總緣五蘊或復別緣故爲此論盡智應言或於身循身觀念住者謂綠色蘊或於受循受觀念住者謂緣受蘊或於心循心觀念住者謂緣識蘊或於法循法觀念住者謂緣想蘊行蘊及擇滅此說不雜緣法念住若雜緣法念住則於五蘊或二二緣或三三緣或四四緣或五總緣二二緣者謂色受緣色想緣色行緣色識緣受想緣受行緣受識緣想行緣想識緣行識緣三三緣者謂色受想緣色受行緣色想識緣色行識緣受想行

緣受想識緣受行識緣想行識緣四四緣者謂色受想行緣色受想識緣色受行識緣色想行識緣受想行識緣或五總緣者謂色受想行識一切總緣其擇滅無爲若有漏法念住亦與色等餘法合緣此中所說是無漏故惟不雜緣諸無漏初靜慮樂諸輕安等覺支樂此何差別答無差別諸無漏第二靜慮樂諸輕安等覺支樂此何差別答無差別問何故作此論答爲止說初二靜慮有無漏樂根者意顯彼二地無無漏樂根故作斯論若有者不應答言此無差別所以者何輕安等覺支樂大善地法中輕安爲自性無

漏樂根大地法中受爲自性故又輕安等覺支樂行  
蘊攝無漏樂根受蘊攝如是二樂便有差別而說無  
差別故知彼二地無漏樂者卽輕安樂是故無漏樂  
根非彼地所有若從等持出彼所緣耶乃至廣說出  
有五種一地二行相三所緣四異類心五刹那此中  
但依二出作論謂地所緣若從等持出彼所緣耶設  
從所緣出彼等持耶答應作四句有從等持出非所  
緣謂如有一思惟此相入初靜慮彼復思惟此相入  
第二靜慮此中所緣以相聲說如綠色蘊初靜慮等  
無間緣色蘊第二靜慮現在前緣餘蘊亦爾是名從  
等持出非所緣問第二靜慮亦是等持何故言出答  
以地別故是故前說依二出作論謂地所緣有從所  
緣出非等持謂如有一思惟此相入初靜慮彼不出  
初靜慮復思惟餘相如綠色蘊初靜慮等無間緣受  
蘊初靜慮現在前緣餘蘊亦爾是名從所緣出非等  
持有從等持出亦所緣謂如有一思惟此相入初靜  
慮彼思惟餘相入第二靜慮如綠色蘊初靜慮等無  
間緣受蘊第二靜慮現在前緣餘蘊亦爾是名從等  
持出亦所緣有非從等持出亦非所緣謂如有一思  
惟此相入初靜慮住經多時如綠色蘊初靜慮流注

相續多時現前緣餘蘊亦爾如蘊非蘊亦爾如初靜慮乃至無所有處亦爾復有別義若從等持出彼行相耶答應作四句有從等持出非行相謂如有一以此行相入初靜慮彼復以此行相入第二靜慮如無常行相初靜慮等無間無常行相第二靜慮現在前餘行相亦爾有從行相出非等持謂如有一以此行相入初靜慮彼不出初靜慮復作餘行相如無常行相初靜慮等無間苦行相初靜慮現在前餘行相亦爾有從等持出亦行相謂如有一以此行相入初靜慮以餘行相入第二靜慮如無常行相初靜慮等無間苦行相第二靜慮現在前餘行相亦持出亦非行相謂如有一以此行相入初靜慮住經多時如無常行相初靜慮流注相續多時現前餘行相亦爾如初靜慮乃至無所有處亦爾復有別義若從行相出彼所緣耶答應作四句有從行相出非所緣謂如有一以此行相思惟此相彼不捨此相復作餘行相如緣色蘊無常行相等無間緣色蘊苦行相現在前緣餘蘊餘行相亦爾有從所緣出非行相謂如有一以此行相思惟此相卽以此行相復思惟餘相如緣色蘊無常行相等無間緣受蘊無常行相現

論

大藏經論卷一百一十三

三

五

在前緣餘蘊餘行相亦爾有從行相出亦所緣謂如  
 有一以此行相思惟此相復以餘行相思惟餘相如  
 綠色蘊無常行相等無間緣受蘊苦行相現在前緣  
 餘蘊餘行相亦爾有非從行相出亦非所緣謂如有  
 一以此行相思惟此相住經多時如綠色蘊無常行  
 相流注相續多時現前緣餘蘊餘行相亦爾如蘊非  
 蘊亦爾如說苾芻乃至想定能達聖旨世尊弟子生  
 非想非非想處彼依何定得阿羅漢果答無所有處  
 問何故作此論答欲令疑者得決定故如契經說有  
 七依定我說依彼能盡諸漏謂初靜慮乃至無所有

處又契經說苾芻乃至想定能達聖旨想定者謂四  
 靜慮三無色能達聖旨者謂能起智斷煩惱修道盡  
 漏或有生如是疑非想非非想處既無聖道若世尊  
 弟子生彼處者依何能盡諸漏將無彼類不由聖道  
 得阿羅漢耶爲令此疑得決定故說彼依無所有處  
 得阿羅漢果復次爲止分別論者說有齊頂阿羅漢  
 故彼說世尊弟子生非想非非想處於命終時煩惱  
 業障三事俱盡不由聖道得阿羅漢果爲止彼意顯  
 盡非俱必由聖道故作斯論問何故但說依無所有  
 處非餘地耶答此於有頂最隣近故問生下諸地亦

論

卷一百一十五

十一

五

有隣近下地無漏何故不說依之盡漏而但說生有頂者耶答下諸地中有自地或上地聖道易可現前非於下地所以者何下地繫善皆已捨故聖道難起由此無有起現前者生有頂不爾自地無聖道又無上地可依不可不由聖道而能盡漏是故下地雖難而起然彼聖道由因力強非加行力暫起現前斷餘煩惱得阿羅漢果已設更住壽經八萬劫終不重起以無用故如說尊者大目捷連言具壽我自憶住無所有處定聞曼陀枳尼池邊有衆多龍象哮吼等聲彼尊者爲在定聞爲起定耶答起定聞非在定問何故作此論答爲令疑者得決定故如毗柰耶說尊者大目捷連告諸苾芻言具壽我自憶在聳峯山住無所有處定聞曼陀枳尼池邊有衆多龍象哮吼等聲時諸苾芻共相謂言今此大目捷連自稱得過人法必無是事應共壞之所以者何住初靜慮者尚不聞聲何況住無所有處定便以此事白佛佛時告曰汝等不應壞大目捷連所以者何大目捷連如想而說故毗柰耶雖作是說而不分別由此或有疑彼尊者在定聞聲欲令此疑得決定故顯彼尊者起定聞聲故作斯論問諸餘聲聞亦知在定不聞聲故尚無此

論

大般若論卷一百八十五

說況大目捷連是最勝聲聞何故乃於苾芻衆中說不應說有說此不必須通所以者何此是僞毗柰耶故謂佛滅後有於素怛纜中置僞文句不應通釋有說定海甚深聲聞如兔不得其底惟佛能盡故彼尊者雖作是說亦無有過問彼尊者豈不知在定不聞聲耶何故作如是說答彼尊者於定自在入出迅疾雖起定聞作住定想謂彼先從欲界善心入初靜慮從初靜慮入第二靜慮如是乃至入無所有處從無所有處起還入識處如是乃至入初靜

慮從世欲界善心現前聞龍象等聲不起分別復還從欲界善心入初靜慮從初靜慮入第二靜慮如是乃至入無所有處從無所有處起還入識處如是乃至入初靜慮從此欲界善心現前不審分別便作是語我自憶住無所有處定聞曼陀枳尼池邊龍象等聲彼但於二心起分別知謂初入定心及後出定心於其中間諸心相續不審分別故作是說亦無有過阿毗達磨大毗婆沙論卷第一百八十五

說一切有部發智

音釋

羸力追切弱也

翫

居六切皮毛之丸也

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9



桐城弟子趙士先施賈刻此  
阿毗達磨大毗婆沙論第一百八十五卷 計  
字六千四百四十七箇該銀三兩二錢二分  
雙足庵釋真福對長洲徐普書涇縣徐世台刻  
萬曆丙辰歲冬十一月徑山化城譔

60

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100

二十七